

重修棗陽縣志卷之十二

藝文 文下

國朝

簾靜軒集存 簾靜軒集邑令柯公所著也公諱聳字岸初嘉善人順治六年進士七年知縣事時當賊氛初靖軍需旁午調發徵派民力坐困詳請大府明令章程集中所載皆保恤殘黎除弊興利之事其讞語自記尤見得情無喜聰明忠愛之致洵濟世之眞詮後世之師表也集得之衛生瞻淇手殘缺已甚夫吉光片羽有識共寶况公之治

重修棗陽縣志

卷之十二

藝文下

一

行卓卓見於辭章爲吾棗所飲和食德者乎謹就其文字可辨者悉刊諸志咸豐三年七月旣望後學山左陳子飭謹記

詳總督祖公文

湖北棗陽縣知縣柯聳爲軍需緊急小民困苦懇賜軫恤以保殘黎事竊念本縣去年天時亢旱民不聊生蹇入孟秋適奉大軍經臨奉派豆草三次共豆五千六百三十石草七萬束時因軍需緊急不敢違悞多方設法勸輸俱經解赴安陸支放不意季冬奉治院調兵到襄又奉派豆三百八十石草

二萬二千束新正初十日正在運解支放聞大將軍阿軍馬駐襄先奉府派黃豆七百四十石草三萬八千束又奉院派解黃豆三千石草十萬束續奉院派豆三千石府派草八萬束一月之內連派豆草三次職因大兵駐襄立等支給事屬軍需安敢褻視遵卽單騎親歷四鄉多方勸諭勉以急公小民俱各陸續運解現今完過數目已及十分之九緣本縣俱係山岡大陸不通舟楫並乏車軌一切豆草等頃俱用夫役肩挑擔負每人止挑豆三斗草止六束計所派豆草之數約用夫役五萬餘名運襄路近者往回四日久者五六月合算

重修棗陽縣志

卷之十二

藝文下

二

夫價數倍於值甚有運至中途力竭命斃是措辦之難雖與各屬相同而運解之苦較之各邑更甚也况本縣一歲額糧不過三千六百八十石有奇今數番料豆已逾五倍自今小民折骨難支嘔血無地若不據實上陳轉恐上虧憲德下竭民力而職亦負隱忍不言之罪矣望俯念民瘼顛懇寬恤庶瘠邑有蘇息之時予遺免溝壑之轉憲恩如天謹繪圖以請

詳撫院遲公文

棗陽縣知縣柯聳看得滕守備病逝顛末未蒙憲批之先業經具文申明今復奉批查報遵卽覆加推鞫滕守備奉檄催

餉五月初一日在馬平港身已抱恙猶復冒暑力疾驅策長途於六月初十日始到棗界十四日到王家店地方病極發狂掣刀自抹雖變起倉卒然痼疾不痊醫藥罔療已非一朝一夕之故頃其子滕駮具詞都司申報憲臺若重委罪於馬如龍諸人則真莫須有矣蓋當殞命之奇若有厲鬼爲祟之狀究竟抹傷之故絕無燭影斧聲之疑無論本官馭下素寬不至召禍且隨役十餘人亦斷無同謀之理卽馬如龍等呼天搶地或難深信而家丁邱槐同時目擊矢口鳴冤寧不鑿鑿可證况通衢非謀命之地白晝豈行刺之時使謀害果真

重修棗陽縣志

卷之十二

藝文下

三

則前此必不奔救後此決不具呈又何以銀冊封識宛然行李肩鑰如故層層細勘無可推敲今其子哀號呼顫原屬父子至情職深爲本官附膺豈敢爲下役祝網惟是按法實無可加原情委屬無妄此實難逃秦鏡也伏讀律文凡謀殺本官當服上刑失出失入如霄如壤若以宇宙莫大之罪加於風馬牛不及之人非特不成信獄並難自昧本心職再四詳慎據實申覆望熟察之

詳撫院趙公文

爲清查豆草完欠以便抵兌事竊查本縣今春奉大將軍阿

駐襄養馬三次奉派豆糧六千七百四十石派草二十一萬八千束原係照糧均派每原徵額糧一石三次共派豆糧一石八斗二升七合七勺八抄派草五十九束一分一釐八毫徵解後續查解襄實經支放完過及解收存府豆糧共五千二百八十四石一斗八升六合支放完過草及收存在府共草一十四萬八千八百九十一束後奉大兵起行停徵合算實完數目每額糧一石實該完豆糧一石四斗三合二勺八抄八撮該草四十三分七釐七毫今查各里花戶有照十分全完者有完及七八分者有完止三四分者更有奉法里長

重修棗陽縣志

卷之十二

藝文下

四

先代花戶完納今行停止花戶便思騙賴短少者亦有集收里老在襄糴買代完今竟無償還者種種不一以致呈訴紛紛若不徹底清查不特懲勸無方賠納莫償且使頑戶自詡得計良民反悔急公將來設有徵派效尤踵弊勢必遲誤急需誠非細故爲此詳請批示將欠完未及分數里戶照定規補完以便給還多完借完諸戶則完欠分明良頑無異抵兌不致混淆矣

詳按院聶公文

爲剔弊事覆看得馬慶文與韓國棟一案職前詳已悉茲奉

鈞批仰見恫瘝民隱批職覆覈所推敲者惟在舊熟與新開  
一間耳細閱慶文抱狀語語含沙竟似與職爲難此棗邑抗  
官藐法積習成風職卽不與深論但先奉有主之荒一例起  
科故以後新開之荒皆入起科之內國棟稱有主之荒例不  
升糧似也若馬慶文現種熟地四百九十餘畝俱係積年見  
熟豈得影作新開希圖展飾若果係新開職凜奉憲行再三  
示著里老清查慶文冊外新開至二百五十餘畝何無片紙  
呈報前奉委踏勘職單騎減從親履慶文田側核其領種者  
有地戶馬天槐等眼同則慶文與族兄慶武及其妻岳吳廷

重修棗陽縣志

卷之十二

藝文下

五

祐等一望膏腴瞭然指掌乃訴稱日新買曰妄報曰連荒踏  
入職雖愚闇豈荒熟畔畛混淆莫辨乎就其顛憲詞稱冊上  
二百四十畝尚屬飛添今踏出熟地已浮其半又云詳中皆  
里書欺誑之口入官之耳職聽斷一秉虛公可矢天日慶文  
纍纍菑畬豈皆里書聚米搏沙掩飾職之耳目乎又云將韓  
九圖糧移六斗入文項下毋論審冊被焚無從查考况已蒙  
電燭不敢復贅至云將馬慶禮糧移一石二斗入文項下查  
審冊慶禮戶載三十五畝過與慶文十畝慶武三畝止存二  
十二畝并新開八畝共糧三十畝慶禮從未派減慶文從何

而添豈得指空畫水而稱無故減添乎前官審戶時冊書通弊皆在瞞隱不在虛栽况果有虛栽情弊事在四五兩年屈指數載甘心輸納有何顧忌結舌無言今日始爲曉曉及職履畝親丈又云不敢言不敢辯何支離矛盾幾如嚙語未醒就慶文粘單云柳堰下地三畝踏作二十三畝前次統連總丈原非虛數今查內有一段原係成熟今春未犁卽行除去尚有見熟地十九畝三分則皆實數可知又云新買張星光高朝龍一併踏入捏作八十九畝職卽令親領覆丈亦俛首無辭又云捨泰山廟荒地二十餘畝亦踏入職勘得此田久

已成熟卽使餘粒施入空門豈原田亦變爲烏有更云虛報百畝前次造冊申報逐段登記弓尺卽詢慶文何段虛數又緘口無言矣且云新開孫長孜等百餘畝據孫長孜稱順治五年領種熟地三十畝周三貴稱順治二年領種熟地二十畝馬天云稱順治初年舊種熟地十五畝夫藉口新開欺漏額稅已屬昧心反云冊書之弊愈堅小民之害愈慘職實不得其解也總之實係隱種非屬新開一言可斷倘念其帶荒免其陞科是出上臺法外之仁非職所敢擅定如慶禮地前不奉委丈勘職何敢事外滋擾今并查勘隱冊外地七十六

畝另行造冊呈覽應否究擬伏候裁示

詳按院聶公文

爲敬陳民困籲勅清別荒熟以便徵輸而甦殘子事看得棗  
邑帶納荒糧之例於順治七年奉有悉照萬歷年間則例及  
有主荒田一例起科之文前任劉知縣署印隨推官查本縣  
額定田地一萬九千五百六十頃畝有零當萬歷年間全熟  
之時原分三則科糧四千八百五十石有零總折徵銀八千  
二百十兩零後經甲戌年流賊肆虐人民死逃以致田地荒  
蕪蓋十有餘載矣順治二年委署縣劉令冊報熟地一千

重修棗陽縣志

卷之十二

藝文下

七

六百八十頃四十二畝一分奉前治院徐行文下縣以鄖兵  
需餉議熟地每畝徵糧三升總共徵糧四千八百石有零五  
年改徵折色每畝三分三釐續又歸併襄藩青山等庄屯除  
荒外熟地一百一十九頃三十四畝零又陸續開墾八十頃  
四十八畝共計徵銀六千二百兩有奇信如民詞所稱熟地  
不及十之一而徵糧則十之七以故劉令隋倅核算熟地一  
千八百八十頃一十四畝一分零又有主荒地三千三百頃  
畝有零合以萬歷年間則例俱以□□科算止該徵銀三千  
二百三十餘兩較之五六年額派已歉二千九百七十兩申

詳本府奉批於無主荒田中再搜有主酌而行之遵卽科算五六兩年額銀六千二百零四兩四錢六分零合田地以三則派算徵糧民屬王屯共該田地一萬三千三百三十頃三十五畝故一畝熟地五六兩年止徵銀三分三釐而七年分徵銀雖仍是三分三釐冊載地畝則有七畝之數務期不悖萬歷年間則例且不減五六年派徵之額是帶荒之例所由起也職自七年四月二十日涖任備詢顛末卽擬據實上聞奈前官冊籍已定不便紛更及查襄屬補納多寡數雖不同亦係通例况軍需告匱額賦難虧所以展轉思維不敢冒昧

今據里書賀起龍等上控憲轅復蒙行縣查議職仰讀憲批所云通邑賦稅小民不言而一二里書言之不知出於何心果實心民瘼抑有所滋弊職細加查審蓋以愚民昧於帶荒之例每勉力終事則欲言而不能奸民明于派補之由反借端發難則能言而失實如前杜中芳等諸人竟以私恨妄瀆比比皆是至若里書下役豈果念切民瘼但就呈中所陳以前任檄提到府刻期算派當時算補是其經手旣爲眾射之的各懷癡索之慮故于按院臨襄俯陳閭閻痛苦之情兼免免日後貽累之計其直陳端委原非影借行私職隨會集合

邑士紳里老詳加詢問如呈中所云清別荒熟是矣勢必踏  
丈通邑咸稱前朝隆慶時亦曾清丈自辛未夏至甲戌冬經  
歷四載方始告成而董其事者則有道府縣佐諸官各里鄉  
約亦有五百六十餘人載在碑誌可考有難歲月竟事況今  
荒地實多保無今日丈荒而明年復熟者乎又如云寬恤輸  
將是矣顧當此軍興孔亟自應徵繕以資飽騰但求於近派  
者無加豈能於前派者求減乎是以職蒿目深籌帶荒已有  
成規定賦實自前任惟念職膺撫字兩年以來開墾之務有  
利必興不敢空言塞責帶荒之事有害必告尤必備陳艱苦

重修棗陽縣志

卷之十二

藝文下

九

繪圖列狀並杜中芳等各呈概爲申明皆體憲臺如傷之仁  
少盡下吏司牧之職也然職更有請者呈中所列遼餉一項  
每畝派銀九釐比正額幾於過倍是前之補納已爲割肉補  
肌今之議加更爲敲骨見髓在職身居民上敢忘恫瘝諒憲  
臺不以人廢言俯察而裁定之倒懸立解豈惟通邑啣結職  
亦荷帡幪之賜矣

詳按院聶公文

爲興革事宜抒管見事案據縣民賀起龍王于禮呈稱棗邑  
土瘠民貧連歲兵凶人民非死則逃十不存一以致地畝荒

蕪原額田地一萬九千五百六十四頃零前朝分列上中下  
三則徵科上地每畝三合七勺零中地一合八勺零下地每  
畝九勺四抄零計徵米麥糧四千八百五十四石一斗九升  
自順治二年蒙治院徐檄行到縣以軍需孔亟鄖襄二屬免  
荒徵熟不分則例每畝派糧三升查本縣熟地僅一千六百  
頃零較原額不及十分之一共徵本色糧四千八百石零五  
年間奉文歸併襄藩庄屯田地一千六百六十五頃二十五  
畝止熟地一百一十九頃二十四畝照民屬一例徵輸該糧  
三百五十七石七斗二升隨又奉文折色每石折銀一兩一

錢每畝科銀三分三釐民屯二項共該科銀六千二百兩有  
奇如數徵解至七年間又奉文田地錢糧照依萬歷年間則  
例有主荒地一併起科計算本縣民屯止共熟地一千八百  
八十頃零有主荒地亦止三千三百六十五頃即使以上則  
起科每畝派算三合七勺八抄七撮止得銀三千三百四十  
兩零較五六兩年額徵已虧二千九百兩比時前縣劉署推  
官隋具文詳府經前襄陽府陸以額糧難缺卽提經承里書  
人等到府刻期算派蒙批於無主荒田中搜作有主酌行補  
派務足見徵額數舊年奉文開墾竭力招徠總計見種熟地

併奉文新開尚不及二千頃之數勢不得不仍於有主之荒併徵足額連年勉力完納已屬難堪近又奉示每畝遼餉九釐設復一例派徵是餉銀反倍正額湯火遺黎銕骨難辦爲此奔命代天電燭下情勅行本縣清分荒熟寬恤輸將緩目前之徵卽裕將來之課萬代瞻仰激切上呈

一棗邑自流氛肆虐以來地則衰草寒烟人則魚驚鳥散轉徙流離忘歸故土今惟有加意招徠假以廬舍給以耒耜牛種令其漸次安集開墾荒蕪三年後勘有成效始入冊陞科並嚴禁土豪強凌侵佔則鋒鏑游魂復歌中澤荆榛滿目漸

重修棗陽縣志

卷之十二

藝文下

十一

致芟除此目下第一要務伏候憲裁

一棗邑城垣四里三分舊設五門鄉勇百名以備守禦年來子遺無幾兼差使浩繁額設民皂不給奔走至於城內煙火寥落城外廬舍蕩然雉堞孤懸捍禦單弱每門止有小甲一名專司啟閉今鄰氛未靖風鶴頻聞棗邑北通河南東接隨州南近德安西連襄郡原屬往來孔道守護不嚴萬一奸宄生心緩急何恃合無召募鄉勇五十名分隸各門早晚巡警另行設給工食不許差擾民間此職未雨綢繆徒薪遠慮者也

一按額輸糧上關國計棗邑土滿人稀開墾不及十之一二有等奸頑投入營兵假領牛種兼併高腴之產冀漏維正之供勢成負嵎里排之追呼莫應鞭朴奚施仰祈申飭嚴行禁革庶上寬縣官催科之掣肘下舒小民額外之賠償矣

詳撫院林公文

爲廣詢利病以濟時艱事案奉本府轉奉憲牌仰將所屬州縣某屬承平某屬尚被賊踞縣官住居何處某屬某鄉安堵某鄉未寧錢糧可徵若干難徵若干一面開報外速將軍民利病細心採訪何利當興何害當除各攄胸臆據實直陳遵

重修棗陽縣志

卷之十二

藝文下

十二

查本縣處郡城之東峙襄江之左賊氛幸爾隔遠四境稍獲敕寧職向住城中泣事錢糧除荒徵熟照額現徵七分每年完徵無缺至軍民利病遵卽據實條對伏惟採擇施行

一豆草當現價預備也小醜未靜師旅繁興欲資飽騰豆草勢所必需但年來大兵經臨或協濟安陸或襄郡喂養俱係臨時酌派非在春初則在夏末皆新舊不接價直壅貴之時况刻期徵納檄票如雷急則無神運鬼輸之方緩則有遲誤軍需之罪棗邑越在漢東離府一百六十里俱係陸路計一夫之力肩豆三斗荷草六束往返四日僱值飯食約費四錢

是擔運之費更數倍於本色矣况乎催提之勒索監收之侵漁隱痛萬狀莫可告訴竊思黃豆粟草郡城種收頗多襄樊七八月間豆每石不過一兩草每束不過一分於此時檄提各縣兵遼二餉內支發五六千金委廉能職官平價收買存貯公所以待不時之需歲終造冊開銷萬一衙役需索或價值短少是在地方官不時密訪無滋別弊則價值不致虛糜呼吸可以立辦而又省民間無窮之冗耗是實利民之大者也

一官屯當寬期徵收也襄郡各屬炊煙不續林木幾空以致

重修棗陽縣志

卷之十二

藝文下

十三

徧地荒蕪徒滋草宅則招徠開墾誠興利之首務矣今既改立官屯牛種現給勸課有方庶幾白草黃沙漸成膏腴沃土而職猶鯁鯁過慮者地之肥瘠不同取課萬難一例糧之輕重迥異徵收安能悉符積荒之壤墾闢非旦夕之功新開之田收穫無篝車之滿而况有地無人豈能役鬼旱澇疫斃難以賠償尚祈酌量地方毋槩責以全功寬省民力毋徒速於奏效輕其分收之數緩其輸納之期至於鄖襄二府方在用兵民無定業卽襄之襄棗二縣稍獲安枕然地薄民稀亦當格外寬恤漸俟生聚日繁民安耕鑿則殫心樹藝自必踴躍

趨赴矣

一各營之採買宜禁也襄郡久罹兵燹生氣未復間有集店不過湯火餘生有無相通獲蠅頭以餬口耳乃時有營將採買一事或云買備營料或云製造衣甲若米若豆若綿布若草束若廢鐵花套出其片紙拴集頭鎖地方著令買備其奉差而來者又必蹲衣怒馬弓刀戛擊殿呵砰訇村鎮愚民畏若天神供應極其豐饒送極其厚稍不如意鞭笞隨之至擔運之路費交納之勒贈更有十倍於本項者雖其發票硃標未嘗不云給價平買而其實所給之價不及十分之三四卽

重修棗陽縣志

卷之十二

藝文下

十四

以飽來差之虎腹而不足也嗟此子遺瘡痍未起骨髓幾何而堪此無窮之敲吸乎伏祈申明嚴禁勒石通衢不許武弁擅用硃票擅差兵丁徑入縣鎮借端採買如有故違許地方人等立拏解赴院道審實重究則若輩無庸張吻而窮黎庶有息肩矣

一刁棍之誣告宜懲也楚風刁訟所在皆然而于襄尤甚往往小有睚眦幾同不共之讐攔路哀號總屬彌天之謊全不據事直書動必粘連單欸一件妄扭數件一欸牽連數人及至臨審之時人半烏有事盡捕風彼但圖聳上聽而騙准行

不知此風一熾正犯固如几上之肉被害亦同網中之魚暗箭含沙鄉愚重足而立更有刁棍明知本地官司易於水落石出於是籍別屬赴控省會各憲批發隔府展轉關提被控之人恐一離本地誤入網羅往往捐鬻妻子以求解脫或解赴彼地即使訊斷法公冤抑幸白而往返數百里守候三四月男不得耕女不得織疲於奔命家資已告罄矣乞勅行各屬以後如有刁民冒籍越告差提擾害者許本地官司據實申明或道或府或廳或縣改批本處就近審結不得隔屬牽累至於單款被害概不准拘果有受冤剝膚者自行另詞申重修棗陽縣志

卷之十二

藝文下

十五

控如此則刁橫漸戢搏噬之毒殘民獲安食息之恒其造福於地方甚大也  
一悍僕之投營宜革也主僕之分等於冠履上下之辨關乎紀綱况襄棗之間兵凶交困主人之得有此僕也或卵翼於米珠薪桂之時或救濟於兵刃流離之日或代爲婚配或給以田房恩固云厚力亦孔艱不過謂此亦人子固結其心永依爲命耳無奈悍僕負恩時多跋扈投兵一著其上策矣朝出主人之門挂名營伍夕入主人之室戟手飛揚號召黨與搬運妻子需索器物主人屏息俛首惟所欲爲若稍與爭執

則訟連怨結禍將不測矣漸至平日一言之讎狠心以圖報復鄰里中人之產辣手以肆貪噬勢等負嵎奸同憑社風俗囂凌莫此爲甚仰乞申勅各營嗣後召募兵丁近者取其鄰黨甘結遠者查其來歷營生毋得混收本地逃僕倘有原主告發卽行斷還如本將徇私霸畱竟許原主控究此事似屬微細然申嚴營將必藉憲嚴爲登高之呼此亦維風化正人心之一端也

詳藩憲林公文

爲籲懇豁免荒糧事覆看得棗陽帶荒始末已悉按院所詳

重修棗陽縣志

卷之十二

藝文下

十六

通計境內民屬王屯前官冊開見種熟地僅一千八百餘頃有主荒地亦止三千三百餘頃若使依則科算賦額有虧因經前縣申詳本府奉批於無主地中搜出有主八千餘頃補足賦額此外無主荒地七千餘頃尚未派徵職七八兩年多方勸諭陸續開墾田地一十七頃七十畝零卽於八年分入則陞科外嗣後又奉憲行開墾三年後方許陞糧又經報過三十九頃一十六畝在案但昔年全盛時棗邑民屬王屯共徵額賦八千八百餘兩今計見徵則有六千二百兩是覈算熟地祇及十分之一而派徵已不啻十分之七矣然熟荒之

額前縣未嘗履畝丈步特出一時審報卽有熟地尙未開報  
總在帶荒之數難繩欺隱之條誠如按憲所批者不獨杜中  
方一人也職七年四月涖任卽擬據實上開奈前縣冊籍已  
定不便紛更兩年以來細思清覈荒熟必須親臨丈勘非歲  
月所能竣事况軍需孔亟國賦難虧前任府縣派徵之例襄  
屬俱同驟難更絃職祇有遵奉前札招徠開墾使熟地日增  
則賠納日減職不敢以空言塞責所以坐稽申報也今奉憲  
批理合申明如以殘疆可憫瘡痍未蘇悉照蘇起科一切帶  
荒悉與蠲免則受賜更多矣倘謂國課不可額虧仍遵舊例

重修棗陽縣志

卷之十二

藝文下

十七

徵糧俟沃壤有期再行減派亦候轉詳按院批示以便奉行

詳督糧道李公文

爲酌定僉選之法以肅漕政事查武昌衛軍丁隸籍棗邑者  
共有頭六千八百戶歷遭亂離死亡幾半額屯田地榛莽居  
多節奉憲行清查造冊申賚又令選殷富之戶撥補漕運竊  
照棗邑崇岡大陸生不見波濤性不習舟楫從不僉點解運  
歲完募夫銀兩久成額例况今流離逃徙卽有開種頂糧悉  
皆赤手待哺若不備情申明朦朧選運嗟此窮軍萬一錢糧  
到手折乾私賣花銷蠶食於時挂欠漕糧虧損國課所係匪

輕故憲臺酌議漕政深慮以富作貧而職目擊凋殘尤難以貧作富所以遲回卻顧不止爲貧丁請命正爲國儲計萬全也今屯老張楚臣等哀籲可憫合無俯念殘黎准賜寬恤不特貧丁荷邀再生卽漕務亦不致耗費矣

詳督糧道李公文

棗邑軍旗久困兵燹故版籍雖存而逃亡過半況生長山麓不習舟航歷來徵募夫銀三兩九錢遵行已久今奉追賠漢漕折耗單開十八名每名十五石按冊拘提現到者不過數名其餘尙在查拘呼籲希免曷敢違背憲行但棗邑離襄陽重修棗陽縣志

卷之十二 藝文下

十八

府陸地一百六十里舟楫不通輓輸無術若照數徵完責令殘喘窮丁肩挑擔負母論盤費倍多併致時日耽悞爲此仰祈垂憐各軍原爲他人代僵顆粒莫非剝肉通融軫恤從輕折價每石批示若干庶追比易於竣局而齎納不致愆期繆陳管見伏候裁示

詳督糧道李公文

爲遵奉會議事照得罰鍰積穀雖係舊制然下邑久罹兵火田地荒蕪巢燕無林哀鴻未集每月詞摺不過數紙職仰遵功令兼愛生平供紙概免並不濫擬一銖苛罰一粒茲奉憲

行萬難足額倘欲設法賠補則點金乏術雨粟無方况條鞭銀兩尚邀除荒徵熟之澤積貯一項豈無捐多爲寡之權卽襄屬各邑難仍舊額而下縣凋殘之甚尤當格外邀恩者也乞俯軫殘疆勿拘成數隨積隨報下吏不致嘆無米之炊窮民亦共沐如天之澤矣

詳荆西道馬公文

看得畫疆而治有分地則有分民棗陽之吳家集雖興隨州接壤然中隔一河河以北屬棗陽河以南屬隨州疆界井然向有棍徒狐鼠叢奸鬼蜮射影事犯棗邑則負嵎隨州事犯

重修棗陽縣志

卷之十二

藝文下

十九

隨州或借名棗邑如雲水寺僧叢菴與張秋兒李舟兒等買蛋被歐殞命其徒普惠赴告諸凶慮干法網先遁隨州屢抗牒提查係人命重情申詳治院批分巡下荆南道轉發襄陽府提審諸凶藐玩罔聞普惠復奔控治院批職隨州亦申詳部院批送憲臺奉檄下縣竊照雲水寺在吳家集河北係棗邑古刹也若屬隨境豈忘其名而悞申雲水爲雲集耶寺係棗地則普惠師徒便係棗民况打死師命一詞普惠告職初情也縣令據詞准理豈能招之來而揮之去耶據云鄧洪林王者佐供自流兵劉濟龍之口維時葉貴李舟兒既能擒獲

濟龍獨不能擒獲兩犯而坐視免脫耶若濟龍確知鄧洪林爲棗陽蘆陂堰人則貴與舟兒應赴本管官司具首豈不直捷反赴隔屬申理何耶羣凶宵遁髡鬼夜號蘆陂堰果有殺人之鄧洪林自當刻期嚴緝就現在原被鞫實成招奚俟關提反爲曲護今蘆陂堰爨煙可數甲冊俱存再四搜查實無其人洪林旣屬子虛普惠從何受賄乃羣凶神通五遁始則捏普惠之名頂告計圖漏網旣則嗾濟龍之口飛扳邀幸代僵豈非賄囑把持之明証耶總之隨州與職均叨民牧皆可審理况並奉撫憲治憲批詞屢諭普惠赴州對簿以便彼此重修棗陽縣志

卷之十二

藝文下

二十

結案奈因諸凶毒焰抵死不甘職非拘見徇私有乖同舟之雅况現奉鈞檄又曷敢膠柱致兩縣寃命無抵但普惠係治院原告現實患病不便卽發俯乞詳請批示從一併結恐稽憲限合先申覆

詳驛傳道王公文

爲申明驛馬料價不敷懇例足食事前奉批發本縣申詳增驛馬料價緣由蒙批准照舊例給發其以前扣存之說該縣何所據而爲此也遵查驛馬料價每匹連夫動支銀二十八兩除照數支給外其以前扣存之說祇因七年以前料價雖

屬官發馬夫實係點充前任每匹連夫止給銀二十五兩二錢職自七年涖任卽奉文官養並不僉點里下斯時料價稍平前數畧可足用且各項錢糧缺額尙多夫馬一項已足支給不敢多爲開銷以滋虛冒是以仍照前任扣算不虞今春以來草束價值比前過倍勢不得不具文申請懇照全書舊額蒙俯賜允遵合行申覆

上巡道李公書

爲土寇截殺事看得楊繼宰一案本年二月間因張加用張倫等或籍南陽或籍鄧州各攜煙薑小物主於本縣楊家集

重修棗陽縣志

卷之十二

藝文下

二十一

鄉民陳四家其人多貨少踪殊可疑後因趕集與范二買布起隙居民楊繼宰執之赴縣惟恐流棍無良釀禍地方耳時因大兵經臨未行訊鞫而加用等有同夥王登雲具控本府批送刑廳業經審明發縣著將王登雲等遞解原籍適職以參謁治憲在府先著原差江傳猷押回各犯訟事已完法無拘繫詎意中夜私逃內中止有陳四關發襄陽縣原差一時疎忽業經申解府廳責懲結案何意登雲等弭筆刁徒陰謀叵測復將楊繼宰等並本地生員楊宏宰捏控學臺蒙批到縣登雲呶呶說夢自揣涉虛久不投到職方擬詳請註銷而

繼宰控憲截殺之詞又奉批發下矣夫問結多時重翻舊案登雲等凌空生波固屬奸同鬼蜮卽繼宰者解縣原呈現存府廳內據事直陳曲直皎然又何必繪此瞞天之詞別構興戎之局據告詞稱陸碑堰買牛刼殺本縣止有蘆陂堰牛行係府縣往來通衢若有截殺事情地方豈不呈報捕官豈不緝查此其不根之詞但知快旗鼓之相當而不顧秦鏡之朗照也茲奉批職審解查王登雲等俱屬隔省若展轉關拘勢必耽延時日止拘陳四到縣細鞫矢口不承且原告在府不回無從對質現奉臺役守提深恐久稽憲件合先將陳四解

重修棗陽縣志

卷之十二

藝文下

二十二

轅仰候憲訊若果事屬剝膚或嚴檄南陽拘提定案倘詞涉風影或申明治憲聽候批銷則刁囂稍息而案牘得清矣

詳巡道李公文

爲催運會勦軍需懇據情轉申兩院事看得逋寇未靖討伐方彰日今會師進勦欲資飽騰必需輦運棗邑雖彈丸一隅心懷敵愾輓輸繹絡義何敢辭前蒙檄下派取運夫職仰體明諭以軍需緊急勒限嚴催務令刻期應解職在奉公理應百竭心力但天時之荒歉異常貧民之罹困已極目擊時艱有不得不痛哭上陳繪圖控告冀憲臺之垂加憐察者卑邑

自鼎定以來雖蒙各上臺撫綏備至業知樂土可依而戶口尚稀生理未復每遇軍需徵發聚眾呼號情實可憐加以旱潦告警十室九空今年自夏徂秋旱魃爲災赤地盡裂一切禾稼俱爲酷燄熏蒸無復收割小民哀號慘目驚心數日來雖迭經下鄉多方勸慰而飢餓切身逃亡接踵間有不安生業欲滋事端者舊歲僉派運夫查一年之內逃散故絕十居其四卽現在舊冊有名各戶亦緣貧荒交迫各懷不終日之計呼鷹不靈較之去年情形迥別况一夫之力荷糧三斗往返必須月餘計其途中自給當不止於三斗旣已身任負戴

軍糧口糧誰爲仔肩若欲僱夫代運合之工價飯食非五六兩一名不可棗邑派夫二千三百名總計夫價必得一萬三千餘兩每年正供止六千兩忽而所費加倍且責之灾荒重困衣食不給之民此如繫千鈞于一羽萬萬不能勝任者也兼之山路崎嶇艱辛萬狀平日壁立蕭然去鄉井如脫屣當此險阻流離強以謹遵嚴命蚊力負山愁苦何似蟬飛脫殼生心何難卽委職官督運而盤旋路徑約束難周倘中道轉徙遲悞軍需釀害尤鉅職愴心天時軫念民力竊思轉餉雖殷而救荒不可無策勦寇是亟而安民尤所當先用是不顧

忌諱據實瀆陳伏乞陽文轉詳暫寬力役之征少甦子遺之喘庶老稚蒙庥地方食福矣

詳署巡道冀公文

照得上司蒞任衙內器用什物向規皆於各屬派辦非特襄陽一郡爲然然必衡量繁省酌均勞逸未有一邑而獨任兩衙門如棗陽者也棗民困窮已極無米而炊徵派繁重動以萬千職革除陋規加意撫恤凡可節省有補於民之處皆籲懇寬免職承辦公事拮据萬分今當憲臺蒞任一應供給照舊函催不得不具陳下情請賜裁奪查襄郡上司公廨以治

重修棗陽縣志

卷之十二

藝文下

二十四

院衙門爲首舊例原在鄖陽未派襄屬其次則道府兩處又其次則戎捕刑三廳係宜光南三縣分任猶爲易辦卽道府兩署論之襄陽首邑止承應宅門外公座執事之需宅內各項俱派棗邑總計修理家伙鋪設鋪墊等件其費數倍外庭而均穀二縣修理概不派辦竊念襄屬七邑疴癢一體本縣何以獨兼其繁費均穀又何獨袖手於局外也伏乞廣賜同仁均齊甘苦批行均穀承行免悞公務倘念二邑荒陬亦候明示本縣量行幫貼共襄完備庶下邑免向隅之泣七屬沐惟均之德矣

詳本府陸公文

爲請動支銀兩事案查全書額派科舉正項並解費共銀壹十八兩一錢五分六毫一絲其六年分已徵解銀五兩九錢九分六釐七毫除荒銀一十二兩一錢五分五釐一毫一絲七年分已徵解銀一十一兩四錢九分二釐六毫一絲除荒銀六兩六錢五分九釐二毫看得六七年缺解科舉銀兩已徵除荒免派今奉藩司催解荒銀必須追徵蠲額奈奉減已經兩年不敢復加編補然奉司詳請待用終難欠解再四搜查止七年分供應備用二項職節省浮費稍有存剩合無于重修棗陽縣志

卷之十二 藝文下

二十五

內動支起解庶不重派民間亦可急濟公用矣

詳本府冀公文八篇

爲查取八年應徵倉口銀數以便支解事案奉本府信牌照得錢糧一項遵照部頒全書派徵爲定制矣但全書內起撥存畱欸項上年雖算有除荒徵熟之數其中或有未確所有八年錢糧倉口似當再一清楚仰縣即便責令經承里書并上年底冊逐一細查通共該徵銀若干一應起撥存畱倉口各項原額該銀若干應除荒銀若干應徵熟銀若干務逐欸清楚總散相符攢造文冊賚府以憑覆覈轉報遵查順治七

年五月內蒙本府差役守提本年分戶書李向陽里書吳三省等前赴府照依全書磨算各項應進應刪地畝欸冊完日回縣該卑縣于七年四月二十日到任提弔原稿到官逐一清覈查得本縣民屬田地三則未錯外止有竹山千戶所寄庄田地已經歸併應管衛所其地畝錢糧應行刪除豈意各書止將地畝刪除其糧銀仍混入民屬欸項隨將戶書李向陽冊書吳三省韓國棟賀起龍究擬斥責并令改正造冊具招於本年八月初六日申詳前府陸蒙批寄庄田地已於五年刪除而該縣錢糧冊亦未造入遵行已久是何大膽經承

重修棗陽縣志

卷之十二

藝文下

二十六

侮法弄權改冊滋擾擅開一弊竇也仰縣重加懲治其錢糧照舊徵解冊併發八年分倉口現奉查取覈算覆看得棗邑田地原有民屯之別前朝竹山千戶所寄庄田地六百一十四頃六十九畝四分五釐九毫每年由本縣徵糧解充襄藩祿米順治五年各衛官詳請治院歸併各屯自行徵解則糧隨田轉本年卽應刪除比版籍無存前官失於釐剔至七年分始抄發全書下縣戶書李向陽里書吳三省等未諳顛末將前項除荒徵熟糧銀一百六十兩八錢九釐五毫四絲七忽仍存民屬欸項內派解職於上年受事之初細加磨對始

得其詳雖將經承究罪申明未蒙前任允示轉申嗟此瘡痍之民正供且不暇給何復堪無產之輸將年復一年漏卮何極幸遇福星臨照百度維新用敢爲殘邑請命倘蒙垂憫子遺轉申減派則賦額清而民困息造福無量矣

爲積蠹疊詐激變事棗邑民風刁險職受事及期每多痛心棘手幸得秦鑑光臨明徹遠邇謹將弊端所積爲憲臺剖瀝陳之下邑地聯秦洛二三子遺旣苦外境巨奸打馬之流禍復受本境神棍射影之狂鋒且敢掣邑令之肘布爪牙之威非獨一事一人也宋榮林向爲民壯革退已久今于三月初

重修棗陽縣志

卷之十二

藝文下

二十七

二日以杜忠芳侵占王庄折毀塞屋告縣差皂檀聯科尙未向本人拘喚是非曲直從未剖理忠芳借名周氏上控臺端此其投明望光之意但詞中羅告無干以檀聯科列名次犯復聞稟稱現倉一犯馬守乾致蒙硃批提解查馬守乾雖爲宋榮林詞犯尙未拘到職素凜憲規何敢輕羈濫禁若差皂果有拘擾定不俟告訐早行重懲倘或聽斷顛倒何能禁其上籲今宋榮林之詞纔一舉筆批行卽告差誑稟以箝制下吏是使職不敢准一詞差一役矣此非曲庇衙役實因治體所關不禁迫切仰瀆也

原任鳳陽府同知李綦粹品宏才清標峻節佐郡而桑麻被野分闡而桃李盈門卽今里居更多懿行菽水愛同孺慕解推誼急故交閉戶著書同下帷之董子甘貧砥節類辭絹之范生望重璠瑜年尤英少不愧有德之稱允堪人才之選倘蒙俯採鄉評轉申題請出自上臺推廣新綸物色隱逸非下吏所敢輕擬也

爲請徵遼餉事查得本縣原額民屬併王屯二項共田地二萬九百四頃二十五畝零因連年兵火田地荒蕪前縣劉令審報民屬王屯共止熟地一千七百九十八頃六十畝一分

重修棗陽縣志

卷之十二

藝文下

二十八

又青山庄地一頃六畝又節年奉文陸續開墾陞糧地八十八頃四十八畝共計實徵糧熟地一千八百八十頃一十四畝一分後於七年奉文遵照萬歷年間則例派徵及有主荒地亦止三千三百六十五頃零較之五六兩年額徵數目已歉二千九百餘兩節經劉令署推官隋倅申詳前任本府陸批於無主荒地中搜出有主八千頃有零均派合邑通融足額小民勉力完辦若今遼餉按畝加徵銀九釐其數較浮正賦職思軍需孔亟小民自應急公惟是湯火遺黎卽熟地征輸尙覺難以支應况又帶荒完辦奚堪重復加編緩難爲上急

難爲下此職所以朝夕徬徨冒昧陳請者也伏乞俯念事關軍需部限難稽民隱可痛或軫殘遺未起申請寬恤或照熟地派徵免其帶補統候轉申定奪勅示奉行

爲查定夫役經費事查得本縣全書額載仁字號紅船一隻派設水夫八名額定工食修船銀六十兩八錢後因流寇踞襄而原船久廢無存其額設銀兩亦因丁地荒絕九年分除荒徵熟寔徵銀三十八兩五錢六分三毫一絲今奉憲行仍復起造船隻應差但本縣地居僻壤俱屬山岡陸路並無舟楫通行造船木植等料尤非土產若欲置備必自外境搬運

重修棗陽縣志

卷之十二

藝文下

二十九

計費不貲且查額徵銀兩止爲水手工食並修船之用原非抵備造船今重造計費甚多設措苦無別項合無申請上臺俯念殘黎轉申驛憲免其成造前項額銀轉發近水鄰邑給贍應差庶憲務得以早完下邑仰沾洪造矣

爲遵查遼餉事查得九年遼餉銀兩派徵間適奉運解豆草奉檄停止所有徵完銀六百三十兩有奇比卽具文申報在案緣豆草緊急隨將前銀六百兩給散里老范應星等齎赴安陸採買湊解今奉檄行扣底隨查九年分條銀各里尙欠三百餘兩遵卽諭令已完遼餉花戶齎票抵扣其完足九年

條銀花戶卽齎遼餉完票當堂赴領祇因九年分花戶有欠條銀兩並欠遼餉者有完遼餉而並完條銀者雖經陸續抵扣一時尙未清結正擬於次月初二日爲始因奉憲檄編審人丁逐里逐甲花戶到堂清審之時面行查詢有欠者執票抵扣無欠者照數給還官民相接挨戶詳覈庶胥役無所施其奸小民無不審其實矣至於未徵之銀抵兌完過豆草緣本縣完納豆草價值五千八百餘兩除奉扣過遼餉楚租止一千七百兩外耑候藩司給發前銀到日便當徹底清算要見某戶完過豆草若干已抵遼餉若干合應給還若干通前

徹後明白完結取具各戶領狀若前目不過概行免徵准作完過豆草似未便另給小票總之已徵未徵之銀統候審丁之時面行抵給完日另造文冊送查聽候不時密傳花戶到臺面訊庶下吏奉行無弊不敢自蹈朦混上負清查之令也

爲修造戰船事照得水師進剿勢必需用船隻奉憲派造勞費惟均職何敢獨爲瑣陳跡涉推諉惟是含默於目前恐致貽誤於日後有不得不據實備申仰祈通融酌派者卑縣承造其不便者有四棗邑地處府東邇來雖稍寧靜然皆陸地山岡並無水路可行舟楫止有瓊家灣帶津水大則一葉稍

通水涸則盪舟無術今造戰船必皆高大巨艦若無路以達大江其不便一也木匠等役原有造屋造船之分各有專技非能兼長本邑既非通水行船之地便無習業造船之人故運斤雖不乏人而造船非其素習勢必往襄宜兩縣僱募彼地現在動工安有餘役充募其不便者二也棗邑雖係旱地又皆平原荒壤並無大谷深山故樹木大者不過徑圍七八寸長止丈餘前經票委徐典史遍鄉查號僅止數十株並無長有三丈徑大一尺外者今派造十隻木料既多本地寥寥數枝絕不敷用須於產地採買而陸路搬運往返稽遲其不

便者三也造船必用油灰等項非比光南等縣本地產油朝夕可以取資又非若襄宜等縣商賈接軫刻期不難買備棗邑非但價值不貲更多物料不湊其不便者四也查前院趙行造砲船著令棗宜共事宜城獨行承造卑縣派幫料價舊例現存合無請乞今造十隻仍照前例分派襄陽宜城二縣總行彙造候兩縣估算料價工食銀兩除領給官價外合行幫費若干職速卽關解在兩邑總此夫匠總此廠作且逼近水次諸項易備兼各再造五隻猶易依限完辦在卑縣措處工價勉遵憲行原非貪逸省費不過因便通融非止倖免罪

戾庶臨期無誤軍需實兩便之道也懇祈轉詳備由上陳  
爲訪舉地方人才事看得本棗陽縣閉戶潛修之彥或自不  
乏但明揚大典非出則鳳儀處則龍臥何以副上臺推轂之  
求而膺大廷闕額之典此職細加咨訪未敢冒昧濫舉以負  
作人之意也

詳戒廳塗公文

爲慎選屯丁事看得各屯丁雖有舊冊前值亂離逃亡過半  
據僅存數名呈稱曾蒙前任白憲查照山縣愚民不善撐駕  
每名徵納募夫銀兩有實收可憑近奉糧道攤追改運漢中  
重修棗陽縣志

卷之十二 藝文下

三十二

折耗漕米十萬石棗邑派十八名每名十五石憲限嚴迫無  
從比追在各軍甚苦剝肉醫瘡而職更虞捉襟露肘時勢交  
窮實難僉選非職奉行之不力也相應申覆聽候上裁

與唐縣關文

看得楊承襲父子罪惡貫盈致罹憲訪然本犯欠完者乃治  
臺贖緩其所告楊受楊宗龍等亦係治臺緊犯本縣與貴縣  
俱係治臺屬邑自應呼吸相通况鋤暴扶良凡忝民牧俱有  
同心本縣豈肯偏聽積惡網詐無辜乎據楊受楊宗龍稟訴  
貴縣原非賣身並無拐財必俟與楊承襲兩造面訊果否主

僕始得真情今兩淮固關皆二犯一面狡詞將使本縣庫銀懸欠無補憲案寢閣難完既長逆僕叛主之風恐非鄰境同舟之雅也

簾靜軒集序

嚴繩光

邑侯柯公當奏績之後邑之寮屬及門下士各以見聞彙公之功德及民者請彙而成書其亦左右史之遺意乎公神明天授之資輔以學問日新之氣

帝眷下邑錫以天人民之既懌政是以成我求懿則古人其難之曷難乎計吏錄廉物望攸歸然清爲刻招創物實甚公

重修棗陽縣志

卷之十二

藝文下

三十三

賦性高寒峨眉雪洞庭月四照花封而行鮮崖異神聽和平其清可能其厚爲難能也徵發狎至民不堪命使高拱廳事以逞淫刑何求不得公出入霜車雨馬與落落晨星之眾弔傷慰苦戴父母之孔邇者何髮膚之是恤其應可能其感爲難能也韓子有言惠不可以獨厚賦不可以獨急夫惠不獨厚公旣體之或以偶急之賦力爲請命而歸其善民之變呻吟爲謳歌者咸曰自天上施其任可能其讓爲難能也若夫對簿棘木之下鏡無畱影不煩辭費臄髀立斷乃天高聽卑有挾懷來者咸使意盡不以知窮人而人自窮於其知然後

上下兩無憾焉其明可能其細爲難能也時事旁午簿書蠅集吏人抱牘而前咸震炫於五官互用若風雨驟至而鬼神將下者及放衙捷閣支頤西爽微吟枯坐以幽其神智如方外靜侶其敏可能其閒爲難能也公絕學逸才翻三峽而凌五嶽高而絕物固其宜也乃樂獎後進待士必以其誠小艷微芳亦登上林之選寸璣片瑜無殊連城之珍其高可能其下爲難能也今其治蹟具在典文壽鼎彝雅音比笙簧太史志之其在詩書間乎張曲江彌天偉業窮著述不克備賈長沙經世鴻文語世務則甚疎政事文學自昔難兼公得而一重修棗陽縣志

卷之十二

藝文下

三十四

之豈非天人哉豈非天人哉今

召自日邊履歸天上持此先資光昭盛治推而準之爾吾儕并州子弟聿觀太平與有榮施矣

梅氏捐修學宮記

王希偁

棗陽爲襄屬名區予自歲之壬午以菲材司鐸是邑每瞻仰聖廟大成殿及東西兩廡見其規模湫隘兼之歲月已多岌岌有傾圮之懼甚非所以妥

先聖而崇鉅典也間與邑大夫朱公同寅徐君陳君暨在學諸子謀擴而新之卒以工費浩繁竟成道旁築室蓋四年於

茲矣乙酉春三月邑民李長祚之妻梅氏夫歿之後苦節自守願以夫所遺田地七百餘畝悉捐爲興修學宮之費邑大夫上其事於台司咸報可於是售其值得白鏹一千有奇鳩工庀材大治土木泐者易欹者支飾其漫漶而崇其卑庠宮牆以內由是完繕華好嗟乎梅氏此舉可謂知要務矣世之岸然七尺稱丈夫者往往株守金帛不能於身家外少出銖黍以襄義舉卽間有所施予亦不過崇尚因果邀求福利徒以增飾浮屠老氏之宮而已若梅氏者不誠加鬚眉一等哉或曰梅氏以乏嗣故乃能爲是慷慨之舉予謂此又不知梅

重修棗陽縣志

卷之十二

藝文下

三十五

氏之心者也向使梅氏有子必督之學督之學必於所當盡之事益欲展其所爲其所措施必更有進於此者迺不幸而僅以此一事了其生平則亦可哀也已雖然梅氏無後而梅氏之名自足垂於不朽以視乎因人俯仰久之卒與蔓草寒煙同歸泯沒者其相去又奚翅徑庭哉予深嘉梅氏之能明大義爲功於學校者實非淺鮮而余與諸君子幾經商榷擴新之謀歷久而不能就者宜何如抱愧也因敘其顛末書以自責且爲斯邑之搢紳先生及同學之人告焉

棗陽縣學宮重修碑記

本朝肇造區夏立國學於邦畿首善之地

頒諭訓迪多士此菁莪棫樸之休風也下迨郡邑莫不並重學宮優崇祀典用以興賢育能爲王國之楨職在長民孰敢不恪遵典禮推廣德意乎嗣煦承乏棗邑已閱五載凡事之所當爲力爲之非好勞也事所當爲而力不能爲與時不可爲者姑俟之非墮事也諸所營建不具述要皆事所當爲者亦何嘗計及於力有不能與時有不可哉至於學宮遲之又久不敢輕議修復者何也攷之往昔創新者惟元泰定間清豐鄧君繼新者惟明萬厯間南昌張君數百年兩人而已歷

重修棗陽縣志

卷之十二

藝文下

三十六

年旣久疊罹兵燹殘蔓斷楸日卽荒涼曩之涖茲土者靡不殫心補葺而旋修旋圯無乃經久之計疎而工力之未能大舉乎迄今廟貌雖存規模漸圯兩廡之傾頽尤甚一經拆卸無尺寸堪用者欲取材於上則耗公欲徵力於下則勞民睠懷良久遂盡出其俸資購木植敦工匠首易櫺星門而新之隨修東西兩廡各五間闕敞堅緻迴異前規復卜吉於學宮之巽位創建魁星樓樓北又建青山書院爲諸生課藝地若工若匠若木石不敢以錙銖累吾民若榱桷若構榱若柱礎不敢以規制聽之工匠甚至引繩操墨目營而口授者幾忘

拮据之勞良以盛典攸關力圖興作行見多士翩聯風雲奮跡作邦家之光以無負

聖天子廣勵學宮誕敷文教之至意也康熙十一年歲次壬子八月望日棗陽縣知縣西蜀劉嗣煦謹撰文

### 謀修邑志啟

伏以一代徽猷端藉有文有獻千秋大典實關其地其人勝事備存於往績微言宜續於新編恭惟文望攸隆卜斯文之未墜道風孔秀知吾道之將興近因教澤誕敷亦賴名儒交贊虞書十六字爲菁莪起化之原風詩三百篇備雲漢爲章

重修棗陽縣志

卷之十二

藝文下

三十七

之盛值茲舊志荒殘適逢新綸校集

煦

眉山閻質漢水勞人

逃稽郡志存亦存其僅存旁採遺編畧并畧其難畧幸文雖微而獻在况地不遠而人存爰是肅請高賢並祈會同多士躬親志局遍訪前聞八大家變化宏深手眼無妨各見十五國性情風俗褒譏諒有同觀或紀言或紀事當斯任者共揚簡冊之光或傳德或傳功後有人焉猶見高曾之矩雖城郭山河無改紀載豈異於前乎而勲名節孝重輝文章莫大乎是矣伏願劍鏗連五尺之天筆陣破千尋之浪宏施採錄上慰諮求行見徽章永著惟文與獻焉盡之益知大典昭垂在

地與人焉已爾欣逢盛事敢告同人

棗陽縣志序

李 璉

粵稽尙書禹貢紀田賦墳墟至篠簋魚鹽之細周禮職方載山川藪數至男女蓄擾之粗漢班孟堅又詳於政治風俗奢儉緩急而作地里志唐宋以來歷代史法因之而郡邑亦各有紀乘所以徵文獻而存掌故也棗陽舊無志戊申夏我巴西聞山劉侯以名進士來令是邑念其地爲漢世祖中興所基其懿蹟舊章宜有存者乃訊之士大夫僉曰兵火頻仍文獻無徵矣侯慨然曰志者一邑憲章所繫大而覽方維表才

重修棗陽縣志

卷之十二

藝文下

三十八

德慎其控馭善其注厝可以恢宏圖審謠俗辨土宜悉其生聚盡其教養厚民社而興頑懦顧可缺畧若此哉於是廣蒐斷簡遍訪軼事加之以討論重之以參訂山澤封埴追成跡之本原賦役出入遵

朝廷之令甲政治文學則大書之以見表章之盛忠孝節義則特書之以彰潛德之輝至若祠宇樓閣旣廢而得不盡廢者皆詳書之以揚其勝詩文歌賦散失而不盡失者亦並存之以覽其全凡兩閱春秋三經草創片言隻字必手自裁決而後成誠所謂憲當代而折其衷祖東京而詳其體者當□

歷代史志並傳千古矣

書棗陽志後

白尙燦

棗陽爲舂陵名區東漢以後歷唐宋元明代有英賢昭垂史冊惟以兵燹頻仍邑乘湮廢吾師邑侯劉公自戊申受事卽以邑志之修復爲己任而時有所不暇力有所未逮也今奉詔書令直省郡縣纂修志乘公旁搜博討或考諸記載或詢諸紳耆遞及巷語塗謠殘碑斷碣綜而輯之歷久成帙尚燦材質疎庸寡聞斟見自辛亥秋得追隨函丈使與參訂所謂閭巷之人得附青雲而顯者與因贅數言於志末

重修棗陽縣志

卷之十二

藝文下

三十九

重修城隍廟碑記

李柱

城隍爲一邑尊神載在祀典邑人瞻禮祈報有年矣祠去城數十步而近其規制宏敞中爲正殿後爲寢殿正殿之前有拜殿旁有兩廡分曹有戲臺有馬殿有三門門皆兩楹計前後殿宇不下數十日久傾圯而分曹之神顛者仆者頽唐者欹斜者化爲泥土者不一狀歲戊申我閩中劉侯來涖茲土首謁城隍見其祠宇荒廢慨然欲爲葺理計因工大費繁遲迴者久越己酉始蠲吉命工力爲修復凡前此之傾危者莫不莊嚴而赫奕焉侯曰兩廡工竣矣門楹未飾馬殿未改非

所以昭壯麗正觀瞻也戲臺未建拜殿未整非所以洽神人肅威儀也爰搆之葺之丹雘之煥乎一新侯復曰後之寢殿所以保我黎庶垂仁壽於無疆者也今廟貌空存門櫺未備何以妥神靈迎休祉乎乃鳩工庀材不畱餘力又從而望之繪之金彩之且清理舊基曲者直之偏者正之界其墻垣附近者不得侵越焉洵盛舉哉噫嘻侯之爲此凡以爲民也諸所營建固難悉數何一非實心實政彰彰在人耳目者乎侯膺特

召入侍趨蹌於郊廟升歌之際後之奉簡書而晉謁者追念重修棗陽縣志

卷之十二 藝文下

四十

經營當必顧而歎曰有是哉侯之恪恭明神協和上下皆有嘉德而無違心也是役也不假募不勞民經始於己酉之春落成於壬子之夏或因時作輟要皆侯之獨立不倦用臻厥成云

鼎建魁星樓記

唐 亮

攷天文杓攜龍角魁枕參首則魁爲北斗第一星也位據至尊與北辰細星相望其象文明所係綦重邑庠舊樓偪處聖宮右腋湫隘汶闔規制非宜閩中劉侯鼎建於東南巽位上應東壁北麗高明精光四照魁星有靈自當鑒侯之心而嘉

侯之功豈第有造於邑之士人也哉

劉侯德政碑

王顯祚

環百里之地其民以千萬數則是千萬其心千萬其耳目與口矣夫以千萬人之心與口與耳目而長百里者以一心一口一耳目周洽焉而無難而千萬人亦遂羣起而服之如一心一口一耳目而無所異此非愛惠存心才與德兼者烏能致此我邑侯聞山劉公之長我舂陵也土若民所爲利賴者若修大成殿及文昌閣魁星樓書院城隍廟據勝樓與夫橋梁雉堞捕盜賊止安插搏豪右除虎害繼之禱祠課士編審

重修棗陽縣志

卷之十二

藝文下

四十一

聽讞頌我侯者亦旣詳言之矣然而知其見於政也而不知其畜於德也昔者災異爲害侯請於帝而旱魃虎倂亦畏服而羣逋格天也患脫巾則力爲調劑而婦子以甯佐騰飽則曲爲區畫而追呼以緩惜民也教博士弟子員以制舉業每一菽成手自刪削而甲乙之雖案牘盈前了無厭倦養士也至如侯之興作也鳩工庀材卽一錙一銖亦不忍以剝吾民而其加意學宮也時當徵芻輓糗悉索維艱之會萬難措手而侯銳意爲之至於落成而後已興作可能也而侯之興作不可能其斷獄也如止水之鏡髮眉如然犀之照枉渚雖有

羣崇亦夔夔睢睢畢露而莫能逃斷獄可能也而侯之斷獄不可能其兼治鄰封也隸帡幪者不相下此曰我侯也彼亦曰我侯也二邦之民如乾州鳳翔之爭於界上兼治可能也而侯之兼治不可能其察戶口而清田賦也上不至於缺額下不至於累民或增或減取而平之如權衡然不盡愜其輕重多寡而不止察戶口可能也清田賦可能也而侯之察戶口清田賦則不可能此皆吾所謂德而見之於政者也夫德體而政用也德本而政末也侯之所爲固合本末體用而有之矣宜乎千萬人之心之口之耳目羣如夫一心一口一耳

重修棗陽縣志

卷之十二

藝文下

四十二

目而無異也哉侯今奉

詔入都邑之人士挽之不可得也借之又不可得無已乃相與悲之悲之不足以云報也又相與祠之祠之亦不足云報也於祠之後建百子堂以永之而屬記於余余嘗讀古歌謠曰悒然不平思我神君何時復來安此下民此公家之已事也記之不足以盡公之德也爲取其歌而歌之

重修城隍廟并神像碑記

城者城也隍者池也金湯之固神以守之所以奠民生資保障也今自省會以至郡縣皆設立專祠爵職之顯擬於公侯

而仲春仲秋兩祭又與日月星辰風雲雷雨同昭禋祀於郊壇之間煌煌鉅典禮隆有加焉棗邑爲古春陵郡城隍廟在南門之西地勢宏敞正殿後殿拜殿東西分曹之廊共數十間前有劇樓翼以馬殿重門壯麗嚴恪輝映中外邑之人奔走偕來祈報於茲者蓋歷有年所矣余自丙子夏調任棗篆下車後遵例週視城垣禮謁於廟見其神像剝落墻壁殘缺愆然不自安竊思

國家設官分職原以撫綏黎庶而卽幽贊明尤須仰託神庥方今世際

重修棗陽縣志

卷之十二

藝文下

四十三

聖明官方整飭而城隍尊神靈爽之所憑依一聽其剝落殘缺風雨飄搖不惟無以昭誠敬其將何以肅瞻視乎因方有事城堤一時工難並舉次年春工竣後進邑人而謀之紳士商民無不踴躍爭先得貲若干緡擇人士之諳練淳謹者董其事鳩工庀材擇吉興修內自殿宇外達劇樓棗棟櫨桷楹椽之朽壞破缺者易之丹雘髹漆之漫漶者新之裝飾神像金彩輝煌兩廊分曹衣冠明備時歷五月而以新以煥氣象爲之一變矣落成之日共請爲文誌之余旣喜邦人之樂善好施非徒中於果報之說而余向之愆然不自安者亦藉以

弛其責也丁丑秋八月知棗陽縣事巴陵黃文瑗謹記

棗陽縣夢魁樓記

邑令 徐芳桂

署之儀門外有譙樓焉昉於元之至正明嘉靖間知縣李君一龍改額勤民樓康熙十年劉君嗣煦又改名據勝茲更易爲夢魁似覺前之名樓意有所屬而今之名樓不免鄰於幻也抑知事必有幾幾者動之微吉之先見者也幾無不應夢其吉之先見與棗邑隸襄郡稽之前代名臣英哲輩出我朝定鼎百餘年菁莪棫樸之化烝烝日上而斯土科甲無聞心竊憂之丁卯仲春夜案牘勞形倦而就枕恍坐公堂之上

重修棗陽縣志

卷之十二 藝文下

四十四

遙見譙樓中有光熒然俄一人冉冉下立於庭階高唱棗陽中式二人余方亟詢姓名爲牆外柝聲驚覺因默記之知夢之有因也是秋余奉調入闈填榜之夕聞堂上唱棗陽廩生黃嘉瑞名諸同事揖予稱賀予曰未也未幾吏復以李爲柯名唱諸公謹詢因爲述前夢之徵咸歎異之且曰今 國家值昌明之會僻壤遐陬胥沐文教當必有聯翩繼起羽翼昇平者則吉之先見而幾無不應皆可於是夢卜之也茲適葺治斯樓爰易其額曰夢魁因述其異而志喜云

青山書院碑記

邑人 田耜傳

春陵古龍飛地廣袤僅百里佳氣鬱葱夙稱名勝攷前志城東里許有滄浪書院舊名濯纓亭不詳其創自何代舊址無存閩中劉公以戊申歲來尹茲土居官廉正庶事釐新尤加意人文嘗徵邑中科名自前明洪武以來士之登賢書捷南宮者濟濟繩繩後先相望而近今落落晨星士氣消沮矣公慨然曰純鈎之出冶也不拭以華陰之土則光芒終汶邑有良材而淬礪不先非余之責乎爰擇勝於聖宮之東舊所謂射圃者建青山書院復建奎樓於書院之巽方與南城文昌閣相望儼然文壇旗幟也公以錦江劍閣之奇毓爲文章發重修棗陽縣志

卷之十二

藝文下

四十五

爲政事邑人士一受甄陶應自奮勵科名安知不復如曩時之盛乎噫文翁治蜀廣仁愛敦教化遣相如東受經訓士而蜀學遂比於齊魯公蜀人稔知蜀事其有造於邑士功當不在文翁下也是爲記

新建春陵書院記

邑人 錢振邦

春陵爲光武龍興之地所謂飛朱光於白水者又名賢世冑炳耀史冊流風至今猶烈明季洊歷兵燹城郭人民化爲灰燼典章文物之舊亦蕩然無復存我

國家覃敷文教於茲百年山陬海澨莫不沾濡百里之區十

室之邑皆能掇科第致顯榮而棗邑殊覺寥寥蓋詩書之不講久矣邑侯徐公以閩中碩儒來尹茲土凡不便於民者悉行革除簿書之暇尤以振興文教爲己任董率師儒時勤考課數年來學者翕然向化丁卯秋闈公奉檄充同考官棗邑中式二人公之新其麗譙更顏之曰夢魁誌喜也邑舊有滄浪青山二書院滄桑之後盡付之荒煙蔓草公慨然以興廢爲念捐俸首倡邑人亦樂輸以助因規其地鳩工庀材不三月而事竣由大門儀門大堂講堂以至書樓齋廚莫不備具恢宏壯麗爲吾邑百餘年來未有之巨觀也公據蘇伯阿佳重修棗陽縣志

卷之十二

藝文下

四十六

氣鬱葱之語名之曰春陵書院擇邑中子弟聰明茂美者延師教督膏火之資薪水之費皆次第措置公之用心可謂至周極備而勞苦兼之矣自我

朝樂育人才能各直省建設書院當路下其事於州縣吾邑遲之又久則是開百年文運之功其原不可沒也棗之人將百世誦公於不朽而况親炙者乎振邦奉公命得共襄厥事今喜其成拜手而爲之記

香草亭記

甘定遇

去廳事不尋丈許有亭翼然高峙聞山劉公字之以笑鶴舊

矣夫鶴禽中之仙也古來逸客畸人類皆賞其高潔以故相鶴有經瘞鶴有銘子鶴而有孤山處士廼劉公率不之顧而以一笑了之吾謂鶴恨不能言耳鶴如能言甯不於青霄杳冥中道屈哉予承乏春陵雅以是亭修潔完好自公無事輒於此焉休息而牆陰砌下又時取菑夸揭車江籬蕙茝之屬周遭列植午夜闌幽香拂拂從簾幙入意殊適也歲壬午以修邑志館潘君漁墩於此時當首夏一切芷芽蘭箭著雨被風情態俱婀娜可愛有間漁墩舉杯相屬曰某懷楚江風物久矣今乃得之於几席非偶然也曷寵之以言予謂漁墩

重修棗陽縣志

卷之十二

藝文下

四十七

以博麗之才摘艷薰香而錫之以嘉名無難也是區區者奚用余爲顧予與君朝夕此亭予奪千古賢者進之不肖者退之因得乎鋤莠植嘉之義而秉彝好德亦臭味之投也笑鶴之名幾思易之而未得無已卽命之以香草紀其遭遇可乎漁墩曰善遂命小胥欸書於壁

甘侯捐置東河橋船官田記

教諭

熊天章

事有歷千百年不能舉得其人一旦爲之若甚易者以民事爲己事而慈惠之意周也邑之沙河自隨之栲栳山逶迤百里至城下環流如帶邑之往來城市涉此者凡三面焉其大

東門外之東洋渡尤爲南北諸省通道當夫夏秋水漲一望  
瀾漫卽水落之後而地勢平衍曠無陵岸黃沙蔽野中流一  
線行者病之乾隆乙卯邑侯甘公來蒞是邑爲治以利民爲  
先知東洋渡之久無良法也相度河勢自捐廉俸卽河之廣  
狹爲建木橋一道由西岸達東凡五十一丈有奇工材務使  
寬厚以便往來又爲渡船以備漲濶又慮事之閱時而難繼  
也復捐金置黃龍岡田地六十畝募佃耕種收租以資歲修  
橋船之需其守護者歲給亦取諸此一毫不以累民非實心  
爲政烏能果於有爲而謀及久遠如是哉棗陽士民誌其事

重修棗陽縣志

卷之十二

藝文下

四十八

於石并欲作歌以垂不朽天章謹拜手而爲之歌曰

皇清敷化周道平平賢侯蒞止軫念通津相茲沙河有盈有  
涸涸不斷流盈無岸泊輿梁難施措以徒杠仍資舟楫以備  
汪洋經久有田厥利綿延維侯遺愛億萬斯年

建修棗陽縣護城堤工記

邑令 周 培

棗陽縣城之東瀕於沙河舊有護城土堤屢築屢圯洪流直  
齧城趾蓋由河源遠流百七十里至城東北忽離故道漸折  
而西而城適當其衝夏秋盛漲汹涌蕩激宜土堤之不足恃  
也癸丑秋余奉調攝縣篆巡視形勢堤不卽修則三面受水

城將日壞於是謀諸邑眾即日鳩工向之土盡易以石且增高焉砥湍激汛溢之水俾之直衝東洲循故道刷沙而南堤之首尾直據地勢最高處不使游波乘凹灌入其堤基盡用長大松椿堤身之土必輦自城北附近疎浮之沙礫不用也又多立石磯以殺水勢於是有輸工者有捐費者皆士民中好義而終事者也始於癸丑十一月望日至次年五月一日堤成昔之轉徙洄漩陂陀傾仄之勢今則如砥如掌完固無虞矣昔之瞻顧杌隍皇然憂懼之境今則從容俯仰恬然相慶矣在事紳耆咸喜相頌曰修廢除害一勞永逸皆使君之

重修棗陽縣志

卷之十二

藝文下

四十九

賜也余則以爲此乃邦人士輸助之力余何功之有焉顧余竊思之余方繫職均陽得與棗人共謀此舉且得歷久以有成功殆冥冥中有默爲相之者與是則成之也非偶抑且增修也無替固此金湯永爲一方捍患其懽愉爲何如也至於興修之在昔踵作之在今或已詳邑乘與夫瑣而不勝紀者概畧而不贅云

棗陽縣修復護城堤記

襄陽太守

陳鏗

易曰王公設險以守其國是守之資乎險也顧邱陵之險地爲之城郭之險人爲之城之險在隍隍之險在水積水爲阻

金湯之所以固也而其用又不同無源者患涸宜用濬有源者患溢宜用防若棗陽之沙河尤患其溢而宜防者矣棗陽瀆水繞城三面曰沙河者廣野被沙而河曼衍其間深非濡軌廣不容刀往者來者褰裳而涉迨夏秋之月因雨驟漲幾於蛟龍奮飛牛馬不辨間歲皆見之丙寅夏水齧城郭女牆敵樓傾圮居者咸惴惴城之趾向有堤其深廣高厚洵足障狂瀾而護城郭而今則蕩刷殆盡矣乾隆壬申余蒞襄郡之始因事至棗大令張君以葺城請余躬詣相度紳庶咸集因告之曰堤與城如輔車唇齒之相依堤不復而水洊至城工

重修棗陽縣志

卷之十二

藝文下

五十

將不立卽立亦難歷久遠僉以爲然願捐貲修復之已具詳列憲咸報允將集費諏吉鳩工適奉調任枝江黃令至因前規而從事焉廼更博詢詳咨於水之砰擊最要處添築石磯二座俾之折旋以去構料募匠鞏基埤土與城工相次告成由是水逼於隄循道通流卽當夏秋水漲力能決沙入地者亦不能泛濫潰決矣襄郡北城一面俯臨漢江雉堞倒影齒齒江中自唐張柬之因壘爲堤數世賴之至明中葉漸決圯萬曆中副使楊公一魁郡守萬公振孫代石甃築蜿蜒屹峙迄今二百餘年我

朝雍正七年奏請存帑收息歲加修護湛恩宏被永固金湯  
維茲沙河雖不同於漢水要其爲安民阜物之功則一也因  
嘆事之興廢殆循環然昔之堤何以漸而廢今之堤何以忽  
焉興可知防不在堤而在人君子於事之旣立功之旣成禍  
害之旣遠必思患而豫防之堤其一端也能無深望於後賢  
乎哉是役也經始於乾隆二十一年至二十二年十一月而  
工竣用夫工二萬六千四百餘名用銀一千八百八十七兩  
六錢零張令名載遠字凝衢湖南常甯縣人黃令名文瑗字  
玉亭湖南巴陵縣人皆能盡心民事無忝厥職者其邑之紳  
重修棗陽縣志

卷之十二

藝文下

五十一

庶能捐貲以衛鄉里亦可嘉也並勒碑陰垂永久焉

重理書院田地記

邑令 鹿啟烈

棗陽書院自滄浪青山廢前令徐君復建春陵書院考邑乘  
舊有義田爲士子肄業之資歲月旣久清理無人莊田歲租  
半隱沒佃戶胥吏而講席之廢歷有年矣歲戊戌子承乏是  
邑紳士以清理講院田地爲請夫建立書院並置義田所以  
端民風作士氣也若肥私廢公名存實亡不知者旣以疑傳  
疑畛域莫辨其知者又視爲公共之物知而不舉致使講席  
虛設肄業無人齋閉塵封煙荒草蔓將視滄浪青山兩書院

同爲廢圃此非獨爲士子憂亦涖茲土者之責也都人士旣皆踴躍赴公予亦欣然從之爰偕諸君躬詣相度陟在巘降在原仿前人弓地之法遠近廣輪之數酌定成規於以供束脩充膏火裕如也事竣諸君子丐予敘其顛末勒諸石予維棗邑自漢唐以迄前明英哲挺生至我

朝舉於鄉登進士第者不概見豈地之能域人歟良由學田廢而培養無術致然耳今竊幸疆里宣畝秩然就序近計數年之蓄足以奉師資遠則十數年之利亦可以備賓興將來士習文風蒸蒸日上鳳翥鷹搏正未可量更由此敦崇禮讓

重修棗陽縣志

卷之十二

藝文下

五十二

砥礪廉隅豈徒文字之末爲博取一時科名計也是爲記

重修棗陽縣城碑記

棗陽雖非楚北劇縣其地毗連雍豫密邇荆襄宋元之季南北交訐適當戎馬之衝城郭半夷爲邱墟明初建置土城上覆以瓦正德時前令安公維藩始易土以磚迄今垂四百年矣其後遞有繕治時復傾頹

國家承平日久人皆安於恬熙憚於勞勩莫爲綢繆之計歷日彌長崩弛益甚其存者亦岌岌欲墮又城之東偏濱河屢爲暴漲所齧曩有石隄以禦衝激年久亦圯歲辛丑余奉調

來泣是邑下車巡視城垣感慨久之踰數月集邑人而謀重修僉以爲然因捐廉爲倡紳商士庶莫不踴躍從公乃陶甃伐石諏吉鳩工擇二三長老董其役余亦時至課其勤惰指其堅瑕始事於道光二十二年壬寅訖工於二十五年乙巳共費錢數萬緡周遭如舊其高厚視舊有加爲門六各建樓櫓觀者皆稱巨麗欣工之成而高厚之足恃也又於濱河之區修護城堤二十餘丈以復舊規雉堞維新金湯永固揭竿探丸之徒望而消其邪心居人得安枕而臥復遠暴漲之虐咸以爲宜壽之金石請爲文誌之余職司守土城垣堤工皆

重修棗陽縣志

卷之十二

藝文下

五十三

應爲之事因思夫春秋成城必書重民力也茲城豈覆篲成哉非民力而何蓋城者盛也非城無以盛民非高堅難於衛患會事以時舉功因眾非如料民而役計畝而材用是罷吾民者等也且邑之民無一日不恃城卽無一日能忘乎城也又安得已於言乎襄是役者紳耆某某例得並書道光二十五年嘉平月知棗陽縣事西川熊文鳳謹記

重修棗陽縣署記

作而必書示不忘也官廡如傳舍苟可以蔽風雨率皆因循遷就莫肯興修余之爲此役也志存於未事之先而幸成於

適然之會也棗邑地當孔道曩時賊匪猖獗廢垣頽瓦雜沓  
榛莽者何可勝數維以馳驅戎馬之身往來其間輒深憑弔  
其後調任襄陽己未春以公事復至棗見民房修葺者半惟  
縣署龐茸傾圮毫無體統相維之勢水懦民玩此未必非其  
一端乎越辛酉因被議開復改除棗陽令竊謂下車而後修  
舉廢墜衙署其首事也乃屬當戎行策虛名者數月剪焉憂  
服泣母幃者三年宦途多歧事與願違客歲因棗案繁劇各  
大憲以維承乏茲士回首前言已十易星霜矣泣棗三時宵  
小頗知斂跡因捐廉募匠爲改造官署之舉邑之人爭奔走

重修棗陽縣志

卷之十二

藝文下

五十四

焉九閱月而工竣門堂寢室必中必正內外防閑有嚴有翼  
居斯堂者所望整飭官方以與斯民相見耳夫難平者事也  
遙憶治襄以來兩隨制使入鄖軍一以司馬佐漢郡署沌陽  
者九月授佷山者三載萍水飄搖一官如寄今適攝篆春陵  
俾衙廡一改其觀是其果有遭乎然而廬舍相望民安其居  
十年之間風景固殊焉乃知今之鳩工庀材規模就理使維  
樂已志之有成而喜爲士民道者幸值無事之時也嘉慶庚  
午季秋之月署棗陽縣事蓬萊張世維記

石虎山砦碑記

郝師亶

虔維我

國家統一寰宇海內承平民生不見兵革而安於畎畝衣食者百七十餘年嘉慶丙辰教匪滋事發難於荆襄蔓延於隨棗焚原赭野老弱暴露各大帥奉

命征勦勅下地方官加意撫綏並申堅壁清野之議令各村落阻險爲固結寨自衛於是川陝楚豫大小寨柵星羅碁布矣棗邑南鄙先有金堡遺蹟與石虎山毗連元戎某公過棗徧覽形勝謂堡地卑狹不如石虎形勢壯濶其事遂定邑侯李公躬詣鄉堡敦勉興作而役重費繁遷延未就邑人明經

重修棗陽縣志

卷之十二

藝文下

五十五

史君光榮歸自黃梅始經營之伐石陶甃壘環山腹圍三重高一丈有奇雉堞規縣城東西二門樵汲之路通守禦之具備爲屋若干間積穀若干石擇紳士之公正者司之饑散而穰歛亦常平社倉之遺意也工始於辛酉春三月至壬戌夏四月李公調任去湘潭陳公繼之以戒以勸而工始就里中父老感邑侯之德與史君之勤勞恭迓陳公及邑之薦紳先生燕饗以樂其成於是史君舉酒相屬曰事貴創始尤貴圖終毋恃寇之不來恃吾有以禦之毋恃壁之實堅恃吾有以固之定內志而外侮不生宣國威而里閭可保一事之舉眾

善備焉而始事之原委與成事之艱劬不有以記之何以昭來茲歷久遠乎是時師亶受棗人之聘設館於史君家日與在工諸君子相往還謹拜手而爲之辭曰

天覆羣生上司民命開物制規山阻正定哀散爲聚制動以靜巖城鑄金作固作鎮春陵鬱鬱白水西流崇山介空巨石連樓寇至則入寇去則休耕鑿不輟和春肅秋桓桓帥謀按壘而遷萬石成壁水抱山連日月臨照淨洗風煙彼魚遊釜此城永堅石山嵯峨雲氣如虎地靈則祥豈惟禦侮克壯斯猷綢繆未雨作新勩勞高墉莊武鄉自爲守何守不固地在重修棗陽縣志

卷之十二

藝文下

五十六

必爭險所當據惟茲管鍵以扃門戶乃率子弟荷戈而戍民有父母相繼而同眾志成城藏此砦功寰海甯謐靖此兵戎曰劒與戟鑄器歸農

重修報恩寺鐘鼓樓記

張師範

春陵昔南陽屬邑也城東北隅有古刹曰報恩寺建自宋時流傳至今凡朝賀盛典皆在於此第歲月既深殿宇不無傾圮以係禮法之所歲時修葺其門東偏有鐘鼓樓巍然高竦則仍舊也乾隆五年元旦夜寺忽遭回祿正殿旁屋間有損壞惟樓盡成焦土夫天下事由成而毀則易由毀而成則難

非有肩其任者而事莫濟非有好善與同其任者而事終不濟一樓雖小亦成敗之所由係也寺之住持名慈海者力任其事跣足募化積有錙銖爰鳩工庀材重爲建修未幾而樓成其中間架異制繁簡殊體而巍然高竦今之樓猶是昔之樓也則眾姓之功德與住持之勤勞烏可以不誌哉

### 楊家蕩重修鳳凰橋記

有水出天封山西南流經楊家蕩市鎮橫亘水間對峙如翼水沿兩街之交自東順流而南又西南流注於泚水唐今名河雖

非巨川實難褰涉市口建石梁以通往來曰鳳凰橋肖地形

重修棗陽縣志

卷之十二

藝文下

五十七

以名之也鎮後復有堤數百尺許以防溪漲歷年既久堤漸奔潰橋亦並圯涉者病焉鎮人欲重修之而工費浩繁艱乎爲力有鄉耆某某毅然爲之首倡里中樂善者咸醵金相助於是伐石鳩工經始於丙午秋九月越十一月而堤橋以次告成共計經費若干功既竣鄉之人相與燕飲以落之予家於隨曾往來其地又以邑人謀修志乘延余叅訂僑居春陵書院縣文學趙君嗣普屬誌其事因爲紀其歲月俾勒諸石時道光二十六年嘉平月之望日隨州高福滂記

### 重修清潭鎮城隍廟前殿記

清潭縣故城在棗邑南九十里唐武德中省入隨州半歸棗陽其城郭廨署皆久爲禾黍惟城隍廟至今獨存峩自移家來鎮歲時伏臘恒隨鄉人士會於祠下顧其牆垣剝落棟宇摧頽而前殿尤甚乃共謀修葺比因經費不給而止里人史公崇禮劉君河清皆好善君子也恫前功未就各捐金爲倡里中殷實之戶皆樂爲輸助卽選日鳩工三閱月而告竣增飾重美復還舊觀祇具牲醴以落之屬峩誌其興修始末峩雖不文竊幸千百年舊跡藉茲不泯謹拜手而爲之記襄其事者各列姓名於碑陰咸豐辛亥邑人劉峩謹志

重修棗陽縣志

卷之十二

藝文下

五十八

邑侯黃公畫像贊并序

錢光國

伏惟頌甘棠者愛其樹歌棗竹者美其人凡以道洽政治德被生民沒世而不忘也惟我邑侯黃公秀鍾衡嶽代著簪纓歲在丙子來涖茲土庶政畢舉百廢具興甫及二載而逝侯之儀型猶在而音容已邈若山河矣時有僧曉叅工繪事邑之人感侯之德囑畫侯像以誌不忘爰拜手而爲之贊曰卓哉我公凌雲特起潁川其族巴陵其里少爲名儒壯歷五仕春陵有緣幸叨福祉士仰高山民歌樂只兩閱春秋聲施忽已思之不得畫像於此諦而視之父母孔邇

彈琴魚賦

邑令 楊裕仁

春間縣試文童以彈琴魚命題限二者不可得兼爲  
韻有請擬作者偶效爲之

客有觀春漲之新流考春陵之舊志當魚尾之筵筵恍琴心  
之惴惴未見安絃乃須投餌欲比琴高之鯉價或論千幾疑  
桐木之魚形看無二爾其石峽源分沙河波瀉盈車不羨乎  
大魚在藻爰歌夫小雅漫云潑刺之眞琴譜手  
法作□而誚聲音之  
假惟望國僑之畜得其所哉豈矜師曠之聰是知音者若夫  
流水知歸落霞如拂不聞指上之聲竟是池中之物三十六

重修棗陽縣志

卷之十三

藝文下

五十九

鱗兮參差二十五絃兮髣髴聽琴聲之如慕或慕仙乎觀魚  
樂之可知爰知我不韻豈悠悠形殊瑣瑣莫教彈鋏竟如高  
士無絃或恐焚琴言尋釣翁乞火魚膏照夜金徽倍澈於歌  
筵魚躍知更金柝如聞夫漁舸倘遇蟹稱擁劍旣琴劍之咸  
宜况聞魚好傳書更琴書之兩可彼若鶯簧囀而有聲蝶板  
飛而無力聽鼉鼓於雨昏擊鼉更於月黑孰如歌傳五絃詩  
賡九罭昔讀吳都之賦琵琶曾記魚名今爲楚水之遊操縵  
又聞水國試看魚舍非緣木以相求此卽琴堂忘筌於旣得  
今者材不逮乎桐梓味莫及乎魴鯁偶小鮮之可試遂枯管

之重拈願勵鳴琴之治自成懸魚之廉廣陵散未得傳人一  
彈難再合浦珠如逢善政二美終兼

宋名臣孟珙傳書後

李鍾僑

珙當南宋擾攘之秋每得一城復一郡必增兵置衛據關設  
險數年襄漢之間所規畫者甚備以時無賢相凡事阻滯措  
施未竟而歿其後元兵南侵呂文煥一人守襄陽力遏其衝  
兵未及國者十年乃知珙之經紀上流其功實大也珙百戰  
百勝兼長於治國昔伊川論蹇之六二以爲事雖不可爲而  
蹇蹇匪躬皆聖賢之所許也珙在宋殆庶幾乎

重修棗陽縣志

卷之十二

藝文下

六十

通凜勸捐重修棗陽縣學宮及各工文

棗陽縣知縣陳子飭爲勸捐興修文廟文昌宮考棚書院各  
工具文稟報事竊維化民善俗道在尊師致用通經功歸養  
士此黌宮之廟宇貴於因時增修而師儒之齋房不可聽其  
缺畧也棗邑學宮建自前朝堂基卑隘殿廡毘連體制諸多  
不符兼之歷年既久侵蝕日甚道光三十年夏秋之交  
大成殿中梁傾圮前縣楊嘉運同教諭劉之彥訓導程保極  
率諸生恭移

至聖先師神位於後殿延傳鄉城紳士發簿勸捐議修未果

旋以陞任交卸七月間子飭接任謁

聖廟禮成後周視內外見磚瓦率多腐壞梁棟均屬黓朽適當陰雨連綿上漏下欹悚惶殊深欲因陋就簡照舊葺補而已枯之木不堪再支就巖之牆何能加飾縣城東南有

文昌宮係前明所建正殿三楹僅可支持頭門拜臺均已坍塌南城之奎星樓亦將近圯縣城之北舊有春陵書院基址道光六年邑人曾構大堂講堂各三間而前無齋房後無正室肄業之所幾如僑寓縣向無考棚每逢歲科兩試官爲搭蓋席棚各文童皆自備桌櫬日暄風吹難施翰墨道遠負重重修棗陽縣志

卷之十二

藝文下

六十一

更苦轉移亦宜購覓爽塏與

文廟各工一律修造惟是工費浩繁驟難厚集且恐未信而勞民將生怨敬商文武同寅廣延鄉城紳耆皆稱職在鄖縣倡修府縣學宮並考院諸工費無虛糜工歸實用在事與出貲諸人悉邀優獎棗邑士民間之已久但請估計工料必當量力捐輸當會同兩學官督率紳士勘估各工約需銀五萬餘兩職先捐銀一千兩爲倡並定明章程出示勸諭捐銀在二百兩以上與二百兩以下者統遵照樂善急公成例或請議敘官職或給花紅匾額仍按次將捐戶姓名銀數揭榜通

衢復於赴鄉之便傳集士商剴切勸導無不踴躍樂輸計自十月勸捐以來已據殷實士民捐銀二萬一千兩有奇謹擇於十一月初一日僱覓工匠祀土興工儘先敬折

大成殿買備灰石先築臺基選派公正紳士歲貢生張鑠增生蔣若蘭廩生黃載元生員宋步瀛張萬選監生王文燦職員宋步雲董大棠均自備資斧在工董事收買物件出納銀錢悉由伊等經手職仍與教官隨時到工稽查其應用石條磚瓦等項已開明尺寸式樣發交窑戶石匠依照採辦惟是棗邑不通河道大木難求專人赴襄陽亦祇得可作椽檁之

重修棗陽縣志

卷之十二

藝文下

六十二

材其梁棟巨木必須赴漢陽購買查程訓導係江夏人與在工黃載元皆能辨材木高下現備銀三千二百兩移交該訓導定期來年正月十八日帶同黃載元束裝赴漢一俟材木辦齊到棗卽當次第重修總期既堅既實永無朽腐之虞盡制盡倫備極輪奐之美除俟工竣開造工料清冊並捐戶姓名履歷詳請

奏獎外謹將勸捐修理各工緣由稟乞鈞核

議修文廟啟

伏以尊神重道禮制燦於古今設教明倫功修備於庠序爲

神聖憑依之地自宜殿廡莊嚴當春秋節和之時何可豆籩  
缺畧况棗邑祥興白水瑞啟春陵溯建武之初年曾傳駕詣  
闕里衍大風之故事定識禮備園橋子弟七千人皆秀彥宮  
牆數仞制極輝煌祇因歲月遷流漸致風雨剝蝕憶壁中之  
絲竹清越罔聞覩院內之蓬蒿淒涼益甚梁已垂地敢云大  
厦能支牆皆就巖更非及肩可比用是上告當路廣諮同人  
念陰隲相協之原思性命幾希之理廢者修墜者舉綢繆原  
貴及時木有本水有源興建務期盡制旁求大木計里泛江  
漢之槎遠覓工師遣人歷秦豫之境琉璃開鴛瓦爲問宜綠

重修棗陽縣志

卷之十二

藝文下

六十三

宜黃階砌盤龍驪直看如飛如躍先捐薄俸典守官分所宜  
然各解清囊名教事義應共任諷吉在一二日事慎厥初分  
理約七八人圖爲懷永凡有血氣莫避怨亦莫避勞莫不尊  
親能肯堂乃能肯構捐貲者淵淵而至總使集腋成裘董事  
者孜孜不遑莫使爲山虧簣云爾咸豐元年中秋之月知棗  
陽縣事陳子飭謹啟

重修棗陽縣學宮碑記

棗邑學宮傳聞建自東漢緣世祖發祥由於春陵建武初駕  
幸闕里後又遣司空宋公以太牢致祭尊師重道實開二百

年之不丕基其於桑梓之地振興學校設立廟宇可以理斷也  
自漢而晉而隋歷唐宋元明之變更城郭宮室雜於荒烟野  
草者何限邑之學宮其基址規模亦幾不可復考矣我

朝統一區夏道隆化洽

詔諭直省郡邑各立學宮春秋致祭上追五代雍正六年又  
特頒明詔文廟遇有塌壞教職州縣當卽時具報請帑興修  
褒崇之典禮儀之加皇皇乎超越千古甚盛烈也縣

文廟在城之東南堂基卑隘殿廡毗連體制諸多不稱咸豐  
元年夏秋之交陰雨連綿垣墉多圯

重修棗陽縣志

卷之十二

藝文下

六十四

大成殿中梁朽垂至地七月杪子飭由鄖縣調任茲土祇謁  
至聖先師教諭劉君之彥訓導程君保極相候於明倫堂禮  
成後同於殿廡內外周視椽棟多朽腐磚瓦多破缺循墻而  
走危巖滋懼非少事補葺所能塞責者也惟念莅任未久官  
民未洽重大之役未敢遽以勞民此後接見鄉城紳耆皆明  
大義謂子飭宰鄖時倡修府縣兩學宮暨試院各工實獲捐  
輸之助棗邑士商民庶素行急公卽請倣效前章俾可集事  
子飭乃捐廉倡率躬歷四鄉剴切申勸無不踴躍輸將約有  
成數延本城紳士張鑠蔣若蘭宋步瀛鄉之黃載元王文燦

董其事出納採辦稽查之未能兼顧者又延張萬選宋步雲董大棠佐之工興於元年十月訖於四年三月爲成大成殿五楹大成門五楹袤長崇廣尺丈有加東廡西廡向之五者益爲七瓦皆琉璃台增石欄後之

崇聖宮深基峻壁巍巍峩峩其櫺星門道德坊名宦鄉賢各祠之附於廟中者皆一力新建廟外之明倫堂兩學齋署所以經營締造亦非復舊規矣工竣擇吉行祭告禮羣情瞻仰動色相告於以嘆吾棗之樂善慕義與郟人如出一轍而飭與文武寮案同事諸君子當此軍需煩興之時猶能廣集眾重修棗陽縣志

卷之十二

藝文下

六十五

力成始成終以仰副

聖天子尊師重道嘉惠士林之至意爲可幸也謹敘其顛末勒石學宮俾後之來游來觀者知庠序之設原以範斯人於詩書禮樂諸生肄業其中者果能服膺師儒陶淑性情父教其子兄勉其弟彬彬乎進於鄒魯則今日之事守土之官與有榮焉歲在甲寅三月旣望山左陳子飭謹撰文

重修文昌宮碑記

又昌星宿名也唐李商隱過梓潼廟畱題其處以文昌稱之亦云上應列宿爲天下文明主也世傳梓潼十七世爲士大

夫身始自周之張仲信而有徵與否所不敢知要其振文  
教範斯人於彝倫陰隲之中洵宜星聚奎聯文運天開矣我  
朝雅化覃敷禮明樂備祀典之垂特崇梓潼爲

文昌帝君兩仲凡祭牲用太牢近復上追前代褒封禮儀幾  
與文廟比隆致自省會以及郡縣皆有專祠而文人學士  
之競言科名者多於鄉村市鎮分建廟宇以致其敬恭之思  
每逢歲時節序焚香酌酒奔走偕來其灑掃庭除必整必潔  
視官府有加焉蓋司命司祿維繫於人心者切也棗邑

文昌宮在縣學櫺星門之東舊有前後殿而地基迫隘外無  
重修棗陽縣志

卷之十二

藝文下

六十六

護墻兼之歷久未修圯塌日甚官之春秋饗祀朔望告虔幾  
不能成禮咸豐元年秋山左陳侯子飭來尹茲土建修  
聖廟之後於文昌宮東添買眾姓房基長十四丈餘寬五  
尺有竒將廟東移二丈爲成正殿後殿拜臺大門各三楹峻  
其垣墉左右擁護齋被庖湑之所畢具又建賓舍書房作義  
學之用時以修輯邑乘招樹滋與在局諸君子共勸其事落  
成之日囑樹滋爲文記之義不敢以荒落辭聞之經言其人  
存則其政舉故入其境田原茂美村落整齊可以覘治化焉  
侯於所蒞之處類皆興廢舉墜咸與維新而其眷眷於學校

者爲尤深去歲秋闈捐金以助士子之觀光春陵書院師生之膏火考課之獎勵捐廉助之又復創建考棚籌備賓興謀始圖成勞而不厭所以作育斯人振興文教殆有合於梓潼之遺意乎所望此邦人士念締造之不易爲樂善之攸同永永年代浸熾浸昌於以上妥神靈旁啟俊乂則侯之志慰矣歲在癸丑十月旣望江陵王樹滋敬撰

### 新建春陵考棚碑記

考棚之設所以集多士拔英才也然惟附郭之邑爲學使案臨者始有之其州縣之有考棚者僅一二見焉棗邑人文蔚

重修棗陽縣志

卷之十二

藝文下

六十七

起應試文童逾千人每逢歲科縣試先期預空署中堂舍廳事及書役公所並疊蓋蘆棚權爲號舍所需几案皆文童自行借備於聽點時結伴移至署內交卷後仍候原伴移出黎明更深人眾擁擠其傷手指挂衣冠所在不免而風雨驟至炎寒莫避以致損污文卷者又藉藉也職員王君國柱原籍太原其先人以懋遷客棗因家於茲已數世有交易泉貨之所在大北街其親朋子弟之應童試者需用几案率假借以爲常王君目覩其來往之勞出入之累擬捐重貲倡修考棚計議未就而卒邑之人述之且感且惜咸豐元年余調任斯

邑有興修

文廟之舉延王君之子文燦分任其役詢及考棚一事文燦  
淒然淚下曰此先子遺意也慨然出制錢二千串交入

文廟大工收存其小東門內文生張玉瑞有地在舂陵書院  
之東亦願捐用因添買張光鑑劉掌等房屋南北計長二十  
丈東西長十四丈有奇擇期於壬子仲秋動工文燦常川在  
工經理其事應用夫價工料皆於大工取足至癸丑夏而工  
竣共成大門一楹二門三楹爲點名之所東西號舍各十五  
間大堂三楹堂之左又爲號舍五間後樓三間爲退處之地

重修棗陽縣志

卷之十二

藝文下

六十八

樓左右屋八間以寓書吏備行廚落成後爲題大門曰舂陵  
文場二門曰天衢初步顏其堂曰萃英締造邃密結構爽塏  
余以七月望後歲科聯試至於九月統計先後場期十三次  
士之翩翩而來者鳳翽鵠立含英咀華欣欣然若登瀛洲而  
庇廣廈一釋其從前搬移之苦而歸美有加焉使非王君之  
好義文燦之善繼善述余卽加意學校烏能遽臻美備位置  
得宜如是哉考竣文燦請爲楹聯並書以與之與斯役者生  
員張萬選職員宋步雲董大棠例得並書咸豐三年十月上  
浣知棗陽縣事陳子飭記

重建明倫堂記

國朝府州縣皆立學學皆有明倫堂崇本育才典至渥也乃創建既久率多蕪陋不治蓋膺民社者簿書鞅掌力不遑及而學之師若弟半皆儒素未敢輕議改作不知化民成俗教學爲先果有雅意扶持者起而荷其貴倡之以實心集之以眾力又何患經營之不克鼎新哉棗邑明倫堂建自乾隆五十六年迄今周六十餘稔矣規模既若湫隘棟宇漸形領圯適山左 陳翊思先生以司馬來尹茲邑下車日毅然以修舉廢墜爲己任若

重修棗陽縣志

卷之十二 藝文下

六十九

聖廟若

文昌宮若考棚或新建或增修不三年次第就理復偕在事諸君子議及明倫堂以 廟之西隅密邇民廬相度東偏基址橫得十丈縱數十丈中建堂三楹堂前射圃堂後暨左右置兩學齋舍數若十所甫匝歲工作完整高明爽塏華而不摩樸而不竅庶使登斯堂者有振興作勵之思躋斯堂者懷鼓舞觀摩之志人材於此茂風化於此淳其功顧不偉哉 先生曾分校己酉鄉闈余倖側門下士咸豐三年夏司鐸來茲欣觀厥成謹秉筆記其事至若經費及

在事都人士姓氏悉泐廟碑可勿贅

揀選知縣襄陽府棗陽縣以教諭銜管訓導事沙羨王伸  
之謹撰

咸豐四年夏伍月

穀旦

重修棗陽縣志

卷之十二藝文下

七十

萃英堂楹聯

白水毓真人溯當年子弟七千能以從龍光舊鼎  
青山啟多士看此際風雲咫尺先爲鳴鳳立高岡  
歲科兩試儲英才爲冠爲童總期通經致用  
堂構一新成大厦善繼善述道在推己及人